

# Daemzngaeux Gyaeunde

Gveigangj Si Cinzdangz Gih Mungzgungh Cin Sinhlingi Siujvoz seiq (I) ban Veiz Meihungz / 韦美虹

Ngoenzneix gou caeuq daxmeh guhdoi hae Hozmeij Cinzdangz youz, gamj daengz daemzngaeux gig gyaeunde.

Lij caengz bae daengz daemzngaeux, gou daj gyae couh nyuq ndaej baenz raq baenz raq heiq homfwtfwt. Daeuj daengz daemzngaeux, raq heiq engq hom lo, ndaw rumz lumj daiq miz feih diemz dem.

Byaij daengz henz daemzngaeux, raen mbawngaeux caeuq va'ngaeux doxdaengh doxingj, gyaeunde lumj fuk doz nei. Gij mbawngaeux hunghanghang heuswdswd lumj boux swbingh ityiengh ndwn youq ndaw daemzngaeux, henhoh va'ngaeux, bang va'ngaeux oiqt dangj rumz dangj fwn. Gou ndwn youq henz daemz, ndenq fwngz bae rumh mbaw de, gij liengzsis couh raih hwnj byaifwngz gou daeuj. Gij va'ngaeux gyaeunde haenx, baenz duj baenz duj, hoengzmaeq fdfwd, limqva lij daiq miz hausak, couh lumj dahsien daenj geu buh hausak. Gij limqva va'ngaeux miz mbangj cungj hai lo, lumj boux dahsau gyaeunde, cuengqlangh gij gyaeunde de; miz mbangj ngamq hai mbiengj he, lumj dahsau najmong, dawz mbiengj naj ndeu goemq hwnjdaej; mizmbangj lij dwg valup ne, lumj boux lwgnyez dam ninz.

Seizneix, miz duz goep ndeu diuq hwnj gwnz



mbawngaeux heuh “gva gva gva”, lumj danqhaenh gij gingjsaek gyaeunde nei. Gij bya ndaw daemz hix youz ndaej engq vaiqvued lo, lumj dwg gij gingjsaek gyaeunde sawj simcingz de engq ndei lo. Sawqmwh, miz duz biengzbeih ndeu mbin gvaqdaej ndwn youq byai va'ngaeux, neix sawj gou siengj hwnj “va'ngaeux ngamq ok lup soemset, caeux miz biengzbeih ndwn gwnz dingj” hot sei neix.

Gou couh yienghneix dingdingh ndwn dwk yawj va'ngaeux, daengngoengz yaek doek roengz bya lo, roeglwg heuh cici caca cij dawz sim gou heuh dauqma. Daxmeh doiq gou naeuz: “Mbwn haemh lo, raeuz vaiqdi baema ranz ba.” Gou cij sij mbouj

ndaej deuz lo.

Daemzngaeux ha daemzngaeux, mwngz dwg yienghhaenx maezvunz. Gou gyaez mwngz, daemzngaeux gyaeunde!

## 美丽的荷塘

今天,我和妈妈一起去荷美草塘游玩,感受到了荷塘的美。

还没到荷塘,我远远就闻到了一股淡淡的荷花清香。到了荷塘边,香味更浓郁了,空气中仿佛带着一股甜味呢。

进入荷塘,映入眼帘的是荷叶与荷花相映成趣的美丽画卷。大片大片的荷叶像士兵一样立在荷塘中,保护着荷花,为娇艳的荷花遮风挡雨。我站在荷塘边伸手轻轻触摸它,一丝清凉便涌上了指尖。而那美丽的荷花,一朵朵,粉红粉红的,花瓣又带一些雪白,就像仙女雪白的衣裳。那荷花的花瓣有的全展开了,像美丽的小姑娘,尽情地绽放着它的美;有的花瓣只开了半边,像羞涩的少女,害羞地把半边脸遮住了;有的还是花骨朵儿呢,像一个贪睡的小宝宝。

这时,一只青蛙跳到了荷叶上,“呱呱呱”地叫着,仿佛在赞美这美丽的景色。水里的鱼儿也游得更欢快了,像是这美丽的景色使得它心情更好了。突然,一只小蜻蜓飞到了荷花上,让我不由地想到了“小荷才露尖尖角,早有蜻蜓立上头”的诗句。

我就这样一直观赏着荷花,直到夕阳西下时,小鸟的叫声才把我的心唤回来。妈妈对我说:“天晚了,我们该走了。”我才依依不舍地离开。

荷塘啊荷塘,你是那么的迷人。我爱你,美丽的荷塘!

(lauxsae son raiz: Luz Siujmei / 指导老师:陆小媚)

## Gij Gyaez Ndaw Makbug

Baenzlai lwgmak, gou ceiq maij makbug, mbouj vih gijmaz, caenh aenvih gwnz makbug miz daxmeh gyaez gou.

Ngoenzhaenx, ma daengz ranz, cuengq daehsaw, gou lumj bingzciengz ityiengh aeu bonj cozyez okdaej, yawj daezmoeg baez youh baez, hoeng uk gou lumj roen raek le, baenzlawz hix siengj mbouj ok banhfap gejdaz.

Sawqmwh, miz sing yiengj heuh gou ndiu dauq, cijraen daxmeh cingq dawz dohbaj haeujdaej uet deih, sing “dungdungdung” itcig cienz haeuj rwz gou, gou simgaenj dwk doiq daxmeh naeuz: “Uet deih itdingh aeu seizneix uet ha? Yienghneix hawj gou baenzlawz sij cozyez ha!” Daxmeh ngiengx gyaeuj ngawh yaep ndeu, lumjnaeuz mingzbeig gijmaz, siujsim riri dwk dawz dohbaj okbae lo. Gou hix ngawz lo, daxmeh mwh yaek byaij miz di siengsim, gvaengzda miz di cumx, gij yiengh neix mboujduenh okyienh youq ndaw uk gou, lumj fag giemq raeh ndeu mbongq sim gou.

Siengj liux haujlai nanz, gou cinjbi hwnqndang yiengq daxmeh boizlaex, hoeng couh youq gou cienq ndang yaep haenx, daxmeh haeujdaej lo, ndaw fwngz dawz gij makbug de mbiq ndei haenx, hozunq naeuz gou: “Saedcaih mbouj rox guh, couh sien cuengq gonq, yietnaiq yaep ndeu.” Geij coenz vah genjdanh haenx hawj gou daengx ndang raeujrub.

Gou naengh roengzdaej, dingdingh yawj baihnaj buenz makbug mbiq ndei neix, nohmak ndongq lumj rinbauj, aeu fwngz lumh hwnjbae couh raeuz lumj nyawh nei. Gou yungh

fwngz menhmenh dawz limq ndeu hwnj, dawz haeuj laj ndaeng mup baez ndeu, gij heiq homfwdfwd hawj ndaw sim gou mbouj caiq simgaenj, haeb gaemz iq ndeu, ndaw van miz geu soemj ndeu. Yienznaeuz gou gig haengj gwn makbug, hoeng ngoenzneix gou cix gwn ndaej gig menh, mbouj lumj bingzciengz ityiengh gwn-guk. Aenvih gou rox, buenz makbug

dangqnaj neix gietcomz gij gyaez daxmeh rimrim bae.

Mbouj rox vih gijmaz, gwn dwk gwn dwk, ndaw sim fwt miz raq siengsim ndeu, youq ndaw raemxda gou raen daxmeh dwgrengz guh hong, rag dohbaj baebae dauqdaej, camx haeuj sim gou.

(Cangh Vangz Suyangz raiz / Danz Yaujsuh hoiz)



## Mizyungh Beij Yienghceij Engq Youqgaen

### Doeg 《Roegenq Caeuq Roegga》Siengj Daengz

Bineix aen gyaigeiz seiznit, gou youh yawj le haujlai saw, ndawde hawj gou geiq ndaej ceiq laeg dwg 《Aen Goj Roegenq Caeuq Roegga》 ndaw bonj 《Gojbeij Yihsoz》.

Aen goj neix cujyau dwg gangj duz roegga ndeu caeuq duz roegenq ndeu beij gyaeu, gyoengqde cungj miz bwn ndaemndongq, cungj nyinhnaeuz swheij ceiq gyaeunde, mbouj doxnyienh. Doeklaeng roegga naeuz, gij gyaeunde mwngz youq



aen geiqciet raeujrub cijmiz, gij gyaeunde gou, lij ndaej bang gou gvaq aen geiqciet nit. Daj aen goj neix ndawde, gou rox lo, raeuz yawj saehcingz, mbouj ndaej dan yawj yienghceij, mizyungh beij yienghceij engq youqgaenj.

Gou caemh miz baez ndeu lumj yienghneix. Geiq ndaej baez de, gou youq Sinhvaz Suhden yawjraen gaiq gau yienghceij lumj gunglungz ndeu, congmbak de gig hung, song baiz heuj ndaw bak de gig raeh, daengx aen ndang yawj hwnjbae hix gig maenh'ak, depgyawj supsuq, gingqyienz lij nyuq daengz raq heiqhom noengznwd ndeu. Gou gyaez mbouj cuengq fwngz, saeuq daxmeh baenzlawz cungj aeu cawx, daxmeh naeuz: “Cungj gau neix cat mbouj seuq law.” Gou youh daej youh nauh mbouj haengj ok bouqsaw daej, doeklaeng daxmeh

dingj mbouj gvaq gou, cijnde cawx hawj gou lo.

Doq daengz ranz, gou doq deq mbouj ndaej lo, doq cek gaiq suek de, anqfwdfwd yawj duz “gunglungz iq” cangqcup neix, lij daengdaengz youq gwnz bonjbouh cozyez raiz loek geij cih saw le aeu gaiq gau neix daej cat, youq mwh gou daeieq, couh raen caen lumj daxmeh naeuz nei, gaenbonj couh cat mbouj seuq. Gou mbouj fug, haengqrengz cat, yungh gyaeuj de cat mbouj seuq, yungh din de cat, yungh le daengx duz gunglungz, cungj cat mbouj seuq, lij dawz giz raiz cih saw loek haenx cat fonx liux. Caen dahraix, mizmbangj doxgaiq, raeuz mbouj ndaej dan yawj gij yienghceij baihrog de, aeu mizyungh cij dwg ceiq ndei.

(Lij Cwzyauz raiz / Lij Lungzfangh hoiz)